


Ni Presidente Thomas S. Monson



# “Agsursurokayo Kaniak”

Iti Ti Simbaan ni Jesucristo dagiti Santo iti Ud-udina nga Aldaw, mannursurotayo amin ken agsursurotayo amin. Nangted ti Apo iti naayat nga awis iti amin: “Agsursurokayo kaniak . . . ket makasarakkayo ti inana a maipaay kadagiti kararuayo.”<sup>1</sup>

Awisek ti amin a Santo a mangutob kadagiti panagkagumaanda a mangisuro ken agsursuro ken kumita iti Mangisalakan a kas Tarabaytayo iti panangaramiddayo iti daytoy. Ammotayo a daytoy a “mannursuro a naggapu iti Dios”<sup>2</sup> ket ad-adda pay ngem iti basta laeng maysa a mannursuro. Isu a nangisuro kadayo nga ayatentayo ti Apo a Dios iti amin a pusotayo, iti amin a kararuatayo, iti amin a pigsatayo, iti amin a panunottayo, ket ayatentayo dagiti padatayo a tao a kas iti bagbagitayo, ket ti Apo a Mannursuro ken ti Pagwadan ti naan-anay a biag.

Isu ti nangipakdaar: “Umayka, surotennak.”<sup>3</sup> “Nangaramidak iti pagulidananyo.”<sup>4</sup>

## Malaksid No

Insuro ni Jesus ti simple ngem nauneg a kinapudno kas naisurat iti Mateo. Kalpasan a bimmaba Isuna ken dagiti disipulona manipud iti Bantay ti Pagbalbaliwan Langa, nagsardengda iti Galilea ket kalpasanna napanda iti Capernaum. Idia nga immasidag dagiti disipulo ken ni Jesus, a kunkunada:

“Asino ti kadakkelan idia pagarian ti langit?

“Ket ni Jesus immayab ti maysa a bassit nga ubing ket

isu inkabilna iti nagtengngaanda.

“Ket kinunana, Pudno kunak kadakayo, *No dikayto agsubli*, ken agbalin a kasla ub-ubbing, dikayto sumrek iti pagarian ti langit.”<sup>5</sup>

Iti Simbaan, ti panggep a tun-oyen ti panangisuro iti ebanghelio ket mangibukbok iti impormasion iti panunot dagiti anak ti Dios, iti may pagtaengan, iti siled ti klase, wenna iti tay-ak ti mision. Daytoy ket saan a panangipakita no kasano ti kadakkel ti ammo ti nagannak, ti mannursuro, wenna ti misionario. Wenna saan laeng a panangpadakkel iti pannakaammo maipanggep iti Mangisalakan ken ti Simbaanna.

Ti kangrunaan a panggep a tun-oyen ti panangisuro ket tapno matulongan dagiti anak a lallaki ken babbai ti Nailangitan nga Ama a makasubli iti sidongna ken mangsagrap iti agnanayon a biag Kenkuana. Tapno maaramid daytoy, ti panangisuro iti ebanghelio ket nasken a mangallukoy kadakuada iti dalan ti inaldaw a panagbalin a disipulo ken sagrado a katulagan. Ti panggep ket mangparegta kadagiti indibidua nga agpanunot, mangrikna, ket kalpasanna agaramid iti maysa a banag maipapan iti panangbiag kadagiti pagbatayan ti ebanghelio. Ti panggep ket mangpapigsa iti pammati ken ni Apo Jesucristo ken agbalin a *nabalbaliwan* iti ebangheliona.

Ti panangisuro a mangparabur ken mangpasurot ken mangispal ken panangisuro a mangtulad iti pagwadan ti Mangisalakan. Dagiti mannursuro a mangtulad iti pagwadan

ti Mangisalakan ket agayat ken agserbida kadagiti sursuruanda. Paregtaenda dagiti dumdungeg kadakuada kadagiti adalen a mainaig iti agnanayon maipapan iti nadosan a kinapudno. Agbibigda iti biag a maikari a tuladen.

### **Agayat ken Agserbi**

Ti unos ti panagserbi ti Mangisalakan ket nangipagwadan iti ayat iti pada a tao. Kinapudnona, ti ayat ken serbisiona ti masansan nga iyadalna. Kasta met a, dagiti mannursuro a malagipko unay ket dagiti mannursuro a nangam-ammo, nangayat, ken nangipateg kadagiti estudianteda. Sinapulda ti napukaw a karnero. Nangisuroda kadagiti adalen iti biag a kanayonto a malaglagipko.

Maysa ti kasta a mannursuro ni Lucy Gertsch. Amammona ti tunggal maysa kadagiti estudiantena. Awan sarday nga inawaganna dagiti naglibtaw iti Domingo wenno saan nga immay. Ammomi nga ipatpategnakami. Awan kadakami ti nakalipat kenkuana wenno dagiti adalen nga insurona.

Kalpasan ti adu a tawen, idi umadani aggibus ti biag ni Lucy, simmarungkarak kenkuana. Malagipmi maipanggep dagita nga aldaw a nabayagen a panawen idi isu ti mannursuromi. Nagsaritaanmi maipapan ti tunggal miembro ti klasemi ket pinaglilinnawaganmi no ania itan ti ar-aramiden ti tunggal maysa. Ti ayat ken pammategna ket agpaut iti tungpal biag.

Pagay-ayatko ti balakad ti Apo a masarakan iti Doktrina ken Katulagan:

“Itedko kadakayo ti bilin nga isuroyo iti tunggal maysa ti doktrina ti pagarian.

“Mangisurokayo a sireregta ket tarabayennakayo ti paraburko.”<sup>6</sup>

Nangisuro a sireregta ni Lucy Gertsch gapu ta nangayat nga awan sardayna.

### **Mangidiaya iti Namnama ken Kinapudno**

Imbalakad ni Apostol Pedro, “Madadaankayo a sumungbat iti isu amin a mangintuudto kadakayo ti gapu ti inanama nga adda kadakayo.”<sup>7</sup>

Nalabit a ti kadakkelan a namnama a mabalin nga idiaya ti maysa a mannursuro ket ti namnama a masarakan kadagiti kinapudno ti ebanghelio ni Jesucristo.

“Ket ania ti namnamaenyo?” Sinaludsod ni Mormon. “Adtoy kunak kadakayo nga addanto namnamayo gapu iti panangsubbot ni Cristo ken ti pannakabalin ti

panangungarna, nga agungar iti biag nga agnanayon, ket daytoy gapu iti pammatiyo kenkuana.”<sup>8</sup>

Mannursuro, itag-ayyo dagiti timekyo ket paneknekanyo ti pudno a kinatao ti Kinados. Ipakdaaryo ti pammaneknekanyo maipanggep ti Libro ni Mormon. Idanonyo dagiti nadayag ken napintas a kinapudno a naglaon iti plano ti pannakaisalakan. Usarenyo dagiti material nga inanamongan ti Simbaan, nangnangruna dagiti nasantuan a kasuratan, a mangisuro kadagiti kinapudno ti naisubli nga ebanghelio ni Jesucristo iti kinatarnaw ken kinasimple dagitoy. Laglagipenyo ti balakad ti Mangisalakan a “sukimatenyo dagiti nasantuan a kasuratan; agsipud ta pagarupenyo nga adda kadakuada ti biagyo nga agnanayon: ken dagitoy isuda ti mangpaneknek ti maipapan kaniak.”<sup>9</sup>

Tulonganyo dagiti annak ti Dios a makaawat no ania ti napudno ken napateg iti daytoy a biag. Tulonganyo ida a maaddaan iti pigsa a mangpili kadagiti dana a mangpatalinaed kadakuada a natalged iti dalan nga agturing iti agnanayon a biag.

Isuroyo ti kinapudno, ket kaduaennakayto ti Espiritu Santo kadagiti panagkagumaanyo.

### **“Agsursurokayo Kaniak”**

Gapu ta naan-anay a managtungpal ken natulnog ni Jesucristo iti Amana, Isu ket “dimmakel iti kinasirib ken kinatayag, ken ti gundaway iti Dios ken iti tao.”<sup>10</sup> Addaantayo kadi iti determinasion a mangaramid met iti kastoy? Kas ken ni Jesus nga “immawat iti ad-adu pay a parabur,”<sup>11</sup> nasken a siaanus ken agtultuloytayo nga agsapul iti lawag ken pannakaammo manipud iti Dios kadagiti panagkagumaantayo nga agsursuro iti ebanghelio.

Ti panagdengngeg ket maysa a napateg nga elemento ti panagsursuro. No agsagsagana a pasursuruan. sikakaragtayo nga agkalikagum iti pammaregta ken pammatalged manipud iti Espiritu Santo. Agutobtayo, agkararagtayo, tayo dagiti adalen iti ebanghelio, ken kalikagumantayo ti pagayatan ti Ama para kadatayo.<sup>12</sup>

Ni Jesus “isursurona . . . kadagiti adu a banag kadagiti pangngarig,”<sup>13</sup> nga agkasapulan kadagiti lapayag a dumngeg, kadagiti mata a kumita, ken puspuso nga umawat. No agbiagtayo a maikari, nasaysayaat a mangngegtayo dagiti arasaas ti Espiritu Santo, a “makaisuronto [kadatayo] ti amin a banag, ken ipalagipnanto dagiti isu amin nga imbagana [kadatayo].”<sup>14</sup>

No sumungbattayo iti naayat nga awis ti Apo, “Agsursurokayo kaniak,” agbalintayo nga umaw-awat iti nadosan a bilegna. Ngarud, agtultuloytayo koma iti panagtungpal, a mangsursurot iti Pagwadantayo babaen ti panangisuro a kas iti kayatna a panangisurotayo ken panagsursuro a kas iti kayatna a panagsursurotayo.

#### **DAGITI NAGADAWAN**

1. Mateo 11:29.
2. Juan 3:2.
3. Lucas 18:22.
4. 3 Nephi 18:16.
5. Mateo 18:1-3; nainayon ti panangyunay-unay.
6. Doktrina ken Katulagan 88:77-78.
7. 1 Pedro 3:15.
8. Moroni 7:41.
9. Juan 5:39.
10. Lucas 2:52.
11. Doktrina ken Katulagan 93:12.
12. Kitaen iti Juan 5:30.
13. Marcos 4:2.
14. Juan 14:26.

---

#### **PANANGISURO MANIPUD ITI DAYTOY A MENSAHE**

Awisennatayo ni Presidente Monson a “mangutob kadagiti panagkagumaan[tayo] a mangisuro ken

agsursuro ken kumita iti Mangisalakan a kas Tarabaytayo iti panangaramidtayo iti kastoy.” Mabalinyo nga ibilang ti panagsukisok kadagiti nasantuan a kasuratan a kaduayo dagiti sarungkaranyo tapno agsapul kadagiti kadagiti wagas nga insuro ken nasursuro ni Jesucristo. Mabalinyo nga irugi iti sumagmamano a nasantuan a kasuratan nga imbasar ni Presidente Monson, kas iti Mateo 11:29, Juan 5:30, ken Marcos 4:2. Mabalinyo nga ilawlawag no kasano a no ania ti nasursuroyon maipapan ken Cristo ket makatulong kadakayo nga “agbalin nga umaw-awat iti nadosan a bilegna.”

## **ANNAK**

### **Panagsursuro maipapan ken ni Jesus**

Ikannatayo ti Espiritu Santo kadagiti natalna a rikna a makatulong kadatayo a mangammo a pudno ni Jesus ken ay-ayatennatayo. Mangisurat wenno mangidrowingkayo iti maysa a banag a nasursuroyon maipapan ken ni Jesus.



Pammati, Pamilia, Tulong

# Naparsua iti Ladawan ti Dios

*Nainkararagan nga adalenyo daytoy a material ken kalikagumanyo nga ammuken no ania ti ibinglayyo. Kasano a ti pannakaawat iti “Ti Kaamaan: Maysa a Waragawag iti Lubong” ket mangpadakkel iti pammatiyo iti Dios ken mangparabur kadagiti ay-aywananyo babaen ti visiting teaching? Para iti ad-adu pay nga impormasion mapan iti [reliefsociety.lds.org](http://reliefsociety.lds.org).*

“Ket ti Dios kinunana, Arami-dentayo koma ti tao iti lada-wantayo, kas kaaspingtayo. . . .

“Ket ti Dios pinarsuana ti tao a kaladawanna met laeng, iti ladawan ti Dios pinarsuana; pinarsuana ida a lalaki ken babai” (Genesis 1:26–27).

Ti Dios ti Nailangitan nga Amatayo, ket pinarsuanatayo iti ladawanna. Maipapan itoy a kinapudno, kinuna ni Presidente Thomas S. Monson: “Addaan ti Dios nga Amatayo kadagiti lapayag a pangdengganna kadagiti kararag-tayo. Addaan isuna kadagiti mata a pangkitaanna kadagiti aramid wenno tignaytayo. Addaan isuna iti ngiwat a pakisaritaanna kadayo. Addaan isuna iti puso a pangrikna-anna iti panangngaasi ken ayat. Isu ket pudno. Isu ket sibibiag. Datayo dagiti annakna a naaramid iti lada-wanna. Kalanglangatayo isuna ket kalanglanganatayo.”<sup>1</sup>

“Dagiti Santo iti Ud-udina nga Aldaw ket ibilangda ti amin a tao kas annak ti Dios iti naan-anay ken kumpleto a kaipapanan; ibilangda ti tunggal tao a nadiosan iti nagtau-dan, nakaparsuaan, ken potensial.”<sup>2</sup> Tunggal maysa ket “maipatpatteg nga espiritu nga anak a lalaki ken

anak a babai dagiti nailangitan a nagannak.”<sup>3</sup>

“Nasursuro met [ni Propeta] Joseph Smith a tarigagayan ti Dios nga awaten dagiti annakna ti isu met laeng a kita ti naitan-ok a panagbiag nga aw-awatenna.”<sup>4</sup> Kas kinuna ti Dios, “Ta adtoy, daytoy ti aramidko ken gloriak—ti mangipatungpal iti saan nga ipapatay ken agnanayon a biag ti tao” (Moises 1:39).

## **Dagiti Mainayon a Nasantuan a Kasuratan**

Genesis 1:26–27; 1 Taga Corinto 3:17; Doktrina ken Katulagan 130:1

## **Manipud kadagiti Nasantuan a Kasuratan**

Ti kabsat ni Jared iti Libro ni Mormon ket nagsapul iti maysa a wagas a mangsilaw iti walo a sasakayan a mangiballasiw iti danum ti baybay kadagiti Jaredite nga agturong iti naikari a daga. Isu ket “nangsukog manipud iti bato iti sangapulo-ket-innem a babassit a bato” ket nagkararag a ti Dios “sagidenna dagitoy a bato” iti ramayna “tapno agrimatda iti kasipngetan.” Ket ti Dios “intagayna ti imana ket sinagidna dagiti bato a saggaysa iti ramayna.” Ket

naikkat ti belo iti mata ti kabsat ni Jared, ket “nakitana ti ramay ti Apo; ket kasla iti ramay ti tao. . . .

“Ket kinuna ti Apo kenkuana: Mamatika kadi kadagiti balikas nga ibagak?

“Ket kinunana: Wen, Apo.”

Ket “nagpakita ti Apo [iti kabsat ni Jared] ket kinunana, “Makitam a naparsuaka a kalanglangak? Wen, kasta met a naparsua amin a tao manipud pay idi punganay a kalanglangak.” (Kitaen iti Ether 3:1–17)

## **DAGITI NAGADAWAN**

1. Thomas S. Monson, “I Know That My Redeemer Lives,” iti Conference Report, Abr. 1966, 63.
2. Gospel Topics, “Becoming Like God,” [topics.lds.org](http://topics.lds.org); kitaen met iti Moises 7:31–37.
3. “Ti Kaamaan: Maysa a Waragawag iti Lubong,” *Liahona*, Nob. 2010, 129.
4. Gospel Topics, “Becoming Like God,” [topics.lds.org](http://topics.lds.org); kitaen met iti *Teachings of Presidents of the Church: Joseph Smith* (2007), 221.

## **Ibilang Daytoy**

Kasano a ti pannakaammo a naparsua ti tunggal tao a kalanglanga ti Dios ket makatulong kadayo iti pannakipulapoltayo kadagiti dadduma?